

Dumonda Gort concernent l'elavuraziun d'in concept d'emprim agid

Bleras vischnancas en il Grischun han gia u'èn londervi d'equipar lur vischnanca cun defibrillaturs (curt AED). Er la vischnanca da Küblis ha gia dapi onns in defibrillatur che sa chatta tar la chasa da scola. Ultra da quai è nossa vischnanca en la situaziun fortunada d'avair ina pratica cuminaivla en il center dal vitg. Quest avantatg n'han natiralmain per bier betg tut las vischnancas. Prendain il vitg da St. Antönien sco exempel. La proxima pratica da medi è per St. Antönien er quella da Küblis. Er sche la via n'è betg serrada pervia da la naiv e po vegnir charrada bain, dura quai in tschert temp, fin ch'ins è en il center dal vitg. En ina situaziun d'urgenza quinta dentant savens mintga minuta. I na gida nagut, sche las vischnancas cumpran defibrillaturs e naging na sa, nua che quels sa chattan. Ed er sch'ins sa quai, n'è l'infurmaziun ch'il defibrillatur sa chatta, sco a Küblis, tar la chasa da scola, pli probabel betg propi utila per persunas che n'enconuschan betg il vitg.

Jau sun en la suprastanza dals pumpiers dal Partenz d'amez. Là è quai vegnì tematisà ed igl è sa mussà ch'i dat chantuns ch'èn bier pli moderns. Saja quai en la registraziun dals lieus u en la signalisaziun e.u.v. En il chantun Grischun exista qua in basegn considerabel da meglieraziun. Beneventà vegnissi fitg, sch'ins cuntanschess per telefon ina centrala da servetsch d'urgenza che pudess immediatmain dir, nua che sa chatta il proxim AED. Quai para propi dad esser in basegn.

Dunna deputada Holzinger ha tematisà quai gia durant l'ura da dumondas da la sessiun da favrer 2020. En quest connex ha la Regenza infurmà tranter auter ch'in barat da datas automatic cun l'app Momentum na saja actualmain anc betg pussaivel. A medem temp èsi dentant vegnì empermess ch'i vegnia previs en il punct central da svilup 6.1 dal program da la Regenza d'examinar ils concepts existents dals fatgs da salvament dal servetsch sanitar. En il rom da questa controlla vegnia er examinada l'introduzziun d'ina app per cas d'urgenza dal cor e da la circulaziun.

Pervia da quai dumond jau la Regenza il suandant:

1. Co sa preschenta il stadi actual areguard in'eventuala implementaziun d'ina app per cas d'urgenza dal cor e da la circulaziun?
2. Po il chantun s'imaginar da registrar en in lieu central p.ex. il lieu, la marca ed il tip dals defibrillaturs, e da metter a disposiziun questas infurmaziuns a las organisaziuns da glisch blava?
3. È la Regenza er da l'avis ch'ina signalisaziun unitara concernent ils lieus dals defibrillaturs fiss raschunaivla sin plaun chantunal?
4. Ha la Regenza ina strategia, co ch'ella tracta questa tematica en sias immobiglias?

Tavau, ils 21 d'avrigl 2021

Gort, Rutishauser, Holzinger-Loretz, Berweger, Brandenburger, Brunold, Cahenzli-Philipp Cantieni, Degiacomi, Della Cà, Dürler, Favre Accola, Felix, Flütsch (Spleia), Föhn, Gartmann-Albin, Gugelmann, Hartmann-Conrad, Hefti, Horrer, Hug, Jochum, Koch, Loepfe, Pfäffli, Preisig, Rettich, Salis, Schwärzel, Thomann-Frank, Ulber, von Ballmoos, Weber, Wellig, Costa, Flütsch (St. Antönien), Pajic, Renkel, Tomaschett (Cuir), van Kleef